

ԷՋԵՐ ՀԱՄՇԵՆԱՀԱՅԵՐԻ XVII—XVIII ԴԱՐԵՐԻ ՊԱՏՄՈՒԹՅՈՒՆՆԵՐ

Բ. Դ. ԹՈՌԼԱՔՅԱՆ (Սոֆի)

Գոյութիւն ունեցող գրավոր աղբյուրները վկայում են, որ համշենահայերի բռնի մահմեդականացման պրոցեսը բուն Համշեն գավառում սկսվել է XVII դ. 30-ական թթ. հետո, իսկ Սյուրմենե գավառակում (Սև գետ, Կարա Դերե)՝ XVIII դ. սկզբներից (1710—1715 թթ.): Հ. Տաշյանը հաղորդում է, որ երբ Կարապետ Զուղայեցին խաչեքարաց գավառում գրում էր «Սաղմոսարանը» (1630 թ.), բնակչութիւնը դեռևս քրիստոնյա էր, և որ դրանից հետո «Համշենի հայերը բռնադատված են նաև զանգվածային կերպով մահմեդական կրօնքն ընդունելու: Ժէ գարու վերջերը սկսած, ավելի ևս ԺԸ դարուն ընթացքին մեջ, տիրող եղած է մահմեդականութիւնը»¹:

XVIII դ. 50—60-ական թթ. սկսած համշենահայերի մահմեդականութիւնը ընդունելու բռնադատված լինելը հաստատվում է նոր գաղթավայրերում համշենահայերի հիմնվելու ժամանակամիջոցի մասին եղած վկայութիւններով: Այսպես, Մ. Բժշկյանը 1817—1819 թթ. Պոնտոսի գավառներում կատարած շրջագայության մասին գրած իր գրքում, Խուռշունլիի (Կուրշումլի, Զարշամպա գավառակ) հայերի մասին հաղորդում է. «Խուռշունլի ավան մոտ է Զարշամպայի, բնակիչներն հայ Համշենու եկած և ամենքը զինվոր գրված են որդվոց որդի և ունեն զորապետ իշխան, որ զիրենք կկառավարեն, մարդե ահ շունին. միայն Տերեպեիին հետ պատերազմ կերթան, և զորավոր մարդիկ են»²: Ուրեմն համշենահայերի զգալի մի հատված այստեղ հիմնվել էր Բժշկյանի շրջագայութիւնից շատ տարիներ առաջ, որ կարողացել էր տնտեսապես ապահով ու մարտունակ համայնք կազմել:

Համշենահայերի մի ուրիշ գաղթավայրի՝ Մալայի շրջանի վերաբերյալ վավերական տեղեկութիւններ է հայտնում Ս. Հայկունին, որը Մալա գյուղը այցելել է 1858—1859 թթ.: «Ավանդությամբ գիտենք, որ երկու դար առաջ այդտեղ հայեր կային: Իմ պապու հայրը (Ղազար) Մալայեն Տրապիզոն եկած՝ հացագործ եղած է»³, — գրում է Ս. Հայկունին: Նրա այս խոսքերից հետևում է, որ մալյեցիների նախահայրերը Համշենից գաղթել էին շուրջ 1655—1665 թթ.: Ապա Հայկունին շարունակում է. «Մալացիք 1730—60 թվականներուն բոլորովին ապահով վայրած են, շնորհիվ իրենց կտրիճ երիտասարդներուն և խոհեմ կառավարիչներուն»⁴: Հետևապես այս փաստն էլ վկայում, որ մալայեցիք այդ վայրերում բնակութիւն էին հաստատել 1730 թ. տասնյակ տարիներ առաջ, մանավանդ որ Հայկունին նաև գրում է. «Համշենի լեռների արևմտյան երեսից հյուսիս կհոսի Սև գետ (Գարատերե) ասված

1 Հ. Տաշյան, Հայ բնակչութիւնը Սև ծովն մինչև Կարին, Վիեննա, 1921, էջ 30:

2 Մ. Բժշկյան, Պատմութիւն Պոնտոսի, Վենետիկ, 1819, էջ 49, 82:

3 Ս. Հայկունի, Հուսեփոյի ազգատոհմ և տարօրինակ ավաղակ Արրիյոմ, Վաղարշապատ, 1905, էջ 9:

4 Նույն տեղում, էջ 10:

մեծ ու պատմական գետը, սորա հովտի ամբողջ տարածությունը Սև գետ և ըստ ժողովրդի՝ Սև գետացիք կասվին, որ համշենցոց պես հայերեն կխոսին, և 1708—10 թվականներուն թուրքացած են կրոնամոլ մոլլաներու և ենիչերիներու ճնշման ներքև»⁵։

Ս. Հայկունին բերում է ուրիշ փաստեր ևս։ Իր «Հուսեփոյի ազգատոհմ և տարօրինակ ավազակ Աբրիյում» գրքի իրական հերոսի՝ Աբրիյումի, ազգատոհմի ժամանակագրությունը մանրամասն թվարկելով, նա նշում է, որ Աբրիյումը ծնվել էր 1795—1800 թթ., իսկ նրա պապի պապը՝ Օվանեսը, փրկվել էր Մալայի կոտորածից ու փախչելով Կալաֆկայի անտառները, 5—6 տարի միայնակ նախամարդու կյանք է վարել, մինչև որ նրան հանդիպել են Սև գետից փախած ու Կալաֆկայում ապաստանած հայերը⁶։ Քանի որ Աբրիյումը ծնվել էր 1795—1800 թթ., նրա պապի պապը, որը նրանից առնվազն 80—100 տարով մեծ կլիներ, կարող էր Կալաֆկա հասած լինել 1715—1720 թթ. ոչ ուշ, իսկ բուն Համշեն գավառից համշենցիների զանգվածային փախուստը դեպի Սև գետ — Սամսոն սկսվել էր մոտավորապես 1650—1660 թթ.։

Համշենահայերին բարբարոս միջոցներով մահմեդականացնելու պրոցեսի 1800-ական թթ. շատ տարիներ առաջ սկսված լինելը հաստատվում է ուրիշ հեղինակավոր վկայություններով ևս։

1800-ական թթ. հայրենի երկրում (Համշենում) մնացած հայերի մեծ մասըն արդեն կես մահմեդական էին և կես քրիստոնյա։ Այդ դրությամբ ականատես Ղ. Ինճիճյանը հաղորդում է. «Իրավիճակն այն էր, որ մեծամասնությունը արդեն մահմեդական եղած էր, բայց կային տակավին քրիստոնյա աղ... Բնական է, որ բուն նորադարձներեն դոնե ոմանք կես-կես են հավատքով, արտաքուստ միայն ցուցանելով զտաճկություն»⁷։

Նույն դրությունը տիրում էր նաև Մ. Բժշկյանի շրջագայության տարիներին՝ 1817—1819 թթ.⁸։ Ավելի ուշ, 1843 թ., Կարլ Կոխը իր շրջագայության ժամանակ, Բիդեից Սպեր անցնելիս, Ճեմիլ գյուղում հյուր է լինում մի համշենցու տանը, որը, ինչպես Կոխն է գրում, «բնականապես շատունց մահմեդականացած էր, սակայն անոր տիպարն այնպես բնորոշ հայկական կզտնվեր, որ թերևս զլխավորաբար հայ արյուն կհոսեր երակներուն մեջ»⁹։ Ս. Հայկունին, որ 1870-ական թթ. այցելել է Սև գետի (Սյուրմենեի) համշենահայ գյուղերը, գրում է. «1840-ական թվերին Համշենում դեռ իրենց ազգային գոյությունը պահել էին 20—30 բնտանիքներ, որոնց սպասարկելու համար Համշեն էր հաճախում Սյուրմենեի ազգասեր քահանա տ. Կարապետ։ Նա բարեկամացավ Համշենու բեկերի հետ, արտոնություն առավ մեծ բեկից (Համշենցի մահմեդական դարձած իշխանաց իշխան—Բ. Թ.), որ տարին մի կամ երկու անգամ Համշեն գնա, նույն տեղ դեռ հայտնի 20—30 տունի չափ հայերուն կրոնական արարողություն կատարե»¹⁰։

5 Ս. Հայկունի, Կորած ու մոռացված հայեր, «Արարատ», 1895, № 7—8, էջ 239։

6 Ս. Հայկունի, Հուսեփոյի ազգատոհմ..., էջ 21—25։

7 Ղ. Ինճիճյան, Աշխարհագրութիւն չորից մասանց աշխարհի, մասն Ա, Վենետիկ, 1806, էջ 395—398։

8 Մ. Բժշկյան, նշվ. աշխ., էջ 96—97։

9 Տե՛ս Հ. Տաշյան, նշվ. աշխ., էջ 27։

10 «Արարատ», 1895, № 7—8, էջ 239—243, 293—297։

XVII դ. վերջերին և XVIII դ. սկզբներին թուրք ասիմիլյատորները իրենց ծրագիրը Համշէնում հիմնականում վերջացրած համարելով, շարունակում են բռնի մահմեդականացման պրոցեսը Սյուրմենե գավառակում, Սև գետի ու Աղբիղի հայերի նկատմամբ, որոնք Համշէնից հետո թվով երկրորդ տեղն էին բռնում Տրապիզոնի նահանգի գյուղական վայրերում: Թուրքերի զործադրած բարբարոսութիւնների մասին առաջին ու հավաստի վկայութիւնները գրի է առել Ս. Հայկունին, որը 1867—1868 և 1878 թթ. հատուկ ուղեորութիւն է կատարել Համշէն ու Սյուրմենե գավառները: Նա այցելել է Սև ու Յամբուլի գետերի շրջակայքում բնակվող մի շարք մահմեդականացած հայերի գյուղերը և իր հաւաքած հավաստի տեղեկութիւնները պարբերաբար հրատարակել է «Արարատ» ամսագրի 1895 թ. 7—8 համարներում՝ «Կորած ու մոռացված հայեր» խորագրով:

XIX դ. 70-ական թթ. պոնտահայութեան կյանքի մասին Պ. Թումայանի՝ Պոլսո պատրիարքին (Խրիմյան Հայրիկին) ներկայացրած ղեկուցագրում հակիրճ տեղեկութիւններ կան նաև Համշէնի ու հատկապէս Սև գետի հայերի հարկադրական մահմեդականացման ժամանակաշրջանի մասին, որոնք որոշ չափով լրացնելով Հայկունու տվյալները, հաստատում են նրա վկայութիւնները: Պ. Թումայանը իր ղեկուցագրում Սև գետի անցքերի մասին գրում է. «Ընչպէս կըստուգվի Ուղի Սամբրա գյուղի Տ. Հովակիմ քահանայի քով գտնված հին հիշատակարանի մը մեջ գրված հիշատակարանն՝ Գարա Տերեյի ամբողջ տաճկանալը և վերջին մաս մը մեացողներու սպանվել և փախչելը՝ հայոց ՌՄԻԹ (1780) թվին պատահեր է, սակայն հալածումը շատ առաջ սկսեր է և ոտք ոտքի հառաջացեր ու տաճկացող հայոց ձեռքով այլ շատ անօրենսութիւններ ըլլալն հետո՝ վերոհիշյալ թվականին Դարատերեյի վերին ծայրը հաղաղ գյուղը վերջացեր է»¹¹: Պ. Թումայանի այս վկայութիւնը նույնպէս հաստատում է, որ Սև գետի արյունալի դեպքերը 1780 թ. շատ տարիներ առաջ են սկսվել:

Հիշված ղեկուցագրում խոսելով Տրապիզոնի մոտակա գյուղերի հայերի մասին, Պ. Թումայանը նաև գրում է. «Տրապիզոնի շինականաց արդի գաղթականութիւնը գրեթե ասկէ դար ու կես առաջ Դարա Տերեյին հոն եկած է»¹²: Զեկուցագիրը գրվել է 1870-ական թթ., ուրեմն հենց ինքը՝ Պ. Թումայանը, հաստատում է, որ Սև գետից հայերի բռնի մահմեդականացումն ու հիմնական գաղթը տեղի են ունեցել 1710—1720 թվականներից սկսած: Հ. Տաշյանը վկայում է Սև գետի զարհուրելի անցքերի 1708—1710 թթ. կատարվելը¹³, նույնն է ասում նաև Հ. Աճառյանը. «1715 թվին սկսվում է Կարա-Դերեյի և Սյուրմենեի հայոց կոտորածը, որի նման դառն աղետ քիչ է տեսնւ-ված»¹⁴:

Զնայած այս բոլոր վկայութիւններին, Պ. Թումայանի հիշյալ ղեկուցա-գրում տեղ ղգտած հետեւյալ հատվածը առիթ է տվել սխալ եզրակացութեան

¹¹ Տե՛ս «Լուծա», Ի գիրք, 1899, էջ 144: Հիշյալ հաղաղ գյուղի որտեղ լինելը ստուգել հնարավոր չեղավ: Սյուրմենեի նախկին բնակիչներ Արութ Քյահյանի (ծն. 1884 թ.), Մինաս Մինասյանի և այլոց վկայութեամբ Սև գետի հովտում հաղաղ անունով գյուղ չի եղել. Սև գետի ամենահեռավոր գյուղերը Թորոսլին ու Այվենն էին:

¹² Տե՛ս նույն տեղում, էջ 174:

¹³ Հ. Տաշյան, նշվ. աշխ., էջ 34:

¹⁴ Հ. Աճառյան, Քննութիւն Համշէնի բարբարոսի, Երևան, 1947, էջ 5:

հանգելու¹⁵։ Պ. Թումայանը գրել է. «Հայոց որ գարու հոն (Սև գետ—Բ. Թ.) գաղթած ըլլալը որոշ չի գիտցվիր, սակայն երկու կողմերն ու երկու պատճառով եկած կերևի այս ժողովուրդը։ Առաջինը Սպեր ու Բաբերդ դաշտերու Թորոսանցու կողմով, կամ բռնությունով ու հարստահարությունով փախչելով և կամ Տերեպեյիներու երկրագործության կամ անոնց թշնամաց դեմ պատերազմելու հրավերով, և երկրորդը Համշեն մեծ գավառն փախչելով հատուկ կրոնափոխությունն ազատվելու նպատակով, առկե գրեթե 170—180 տարի առաջ»¹⁶։

Այստեղ ակներև է, որ Պ. Թումայանը տեղյակ չի եղել, որ Սյուրմենեն հայաբնակ է եղել դեռևս թուրքերի այդ վայրերը գավթելուց շատ դարեր առաջ։ Նա նույնիսկ ծանոթ չի եղել իր ժամանակակից Ս. Հայկունու լիարժեք այն վկայություններին, թե մինչև Համշենում կատարված վայրագություններից առողարած հայերի մի մասի Սև գետում ապաստանելը այնտեղ ապրում էին շուրջ 6000 տուն հայեր։ Համադասպ Ոսկյանի վկայությամբ դեռևս X—XII դարերում Տրապիզոնի նահանգում գործող հայկական 13 վանքերից մեկը՝ Ս. Վարդան կամ Վարդանանց անունով, գտնվում էր Սյուրմենում¹⁷։

Սխալ է Թումայանի այն կարծիքը, թե XVII դարում Համշենից փախած հայերն են վերաբնակվել Սյուրմենում ու որոշ ժամանակ անց ենթարկվել բռնի կրոնափոխության կամ թե նրանք կազմել են Սև գետի հայ բնակչության մեծամասնությունը։

Ճիշտ չէ նաև Համշենի գավառից կրոնափոխությունից ազատվելու նպատակով փախչող հայերի մասին Պ. Թումայանի հայտնած այն կարծիքը, թե դա տեղի է ունեցել «գրեթե 170—180 տարի առաջ», այսինքն՝ 1690—1700 թթ.։

Թերված փաստերը վկայում են, որ համշենահայերի բռնի մահմեդականացումը բուն Համշեն գավառում սկսվել է 1650—1660-ական թթ., իսկ Սև գետում (Սյուրմեն)՝ 1710—1715 թթ. ու շարունակվել XVIII դ. ընթացքում։ Համշենահայերի հանդեպ հալածանքը չդադարեց նաև ամբողջ XIX դարում, իր գագաթնակետին հասնելով 1895—1896 և 1915 թթ.։

СТРАНИЦЫ ИЗ ИСТОРИИ ХАМШЕНСКИХ АРМЯН В XVII—XVIII вв.

Б. Г. ТОРЛАКЯН (Сочи)

(Резюме)

Анализируя сведения, содержащиеся в работах ряда исследователей, а также путешественников, посетивших область Хамшен в XIX в. и начале XX в. (К. Кох, Г. Инджиджян, Л. Бжшкян, П. Тумаян, А. Ташьян, Гр. Ачарян), мы считаем, что насильственное обращение хамшенских армян в магометанскую веру в собственно Хамшенском районе началось во II половине XVII в. (ок. 1650 г.), а в Сурмененском районе (Севгет, Кара-дере)—в начале XVIII в. (ок. 1710—1715 гг.).

¹⁵ Տե՛ս «Բանբեր Երևանի համալսարանի», 1969, № 2, էջ 136—137։

¹⁶ Տե՛ս «Լուսմա», Բ գիրք, 1899, էջ 175։

¹⁷ Տե՛ս Հ. Ոսկյան, Սեբաստիո, Խարբերդի, Դիարբեքիի և Տրապիզոնի վանքերը, Վիեննա, 1962։